

四庫全書

集部

欽定四庫全書

山谷集卷六

宋 黃庭堅 撰

古詩五十一首

題小猿叫驛

知命

大猿叫罷小猿啼
箐裏行人白晝迷
惡藤牽頭石齧足
嫗牽兒隨淚錄續
我亦下行莫啼哭

筇竹

道人手插兩三竹使君忽來唾珠玉不須客賦千首詩
若是賞音一夔足世人同處但同流一絲不掛似太俗
客來問我有何好道人優波遠山綠

石本問我作莫
問優波作優曇

次韻李任道晚飲鎖江亭

西來雪浪如魚烹兩崖一葦乃可橫忽思鍾陵江十里
白蘋風起縠紋生酒杯未覺浮蟻滑茶鼎已作蒼蠅鳴
歸時共須落日盡亦嫌持盞僕屢更

再次韻兼簡履中南玉三首

李侯詩律嚴且清諸生賡載筆縱橫句中稍覺道戰勝
曾次不使俗塵生山繞樓臺鐘鼓晚江觸石磯礧杵鳴
鎮江主人能致酒願渠久住莫終更

江津道人心源清不繫虛舟盡日橫道機禪觀轉萬物
文彩風流被諸生與世浮沈惟酒可隨時憂樂以詩鳴
江頭一醉豈易得事如浮雲多變更一作喜
變更

鎖江亭上一樽酒山自白雲江自橫李侯短褐有長處
不與俗物同條生經術貂蟬續狗尾文章瓦釜作雷鳴

古來寒士但守節夜夜抱關聽五更

次韻任道食荔支有感三首

一錢不直程衛尉萬事稱好司馬公白髮永無懷橘日

六年怊悵荔支紅

今年荔支熟南風莫愁留滯太史公五月照江鴨頭綠

六月連山柘枝紅

舞女荔支熟雖晚臨江照影自惱公天與蹙羅裝寶髻

更接猩血染殷紅

廖致平送綠荔支為戎州第一王公權荔支綠酒
亦為戎州第一

王公權家荔支綠廖致平家綠荔支試傾一桮重碧色
快剥千顆輕紅肌撥醅蒲萄未足數堆盤馬乳不同時
誰能同此勝絕味唯有老杜東樓詩

杜子美宴戎州東樓詩云重碧醅春

酒輕紅
臂荔支

謝楊履道送銀茄四首

藜藿盤中生精神珍蔬長蒂色勝銀朝來鹽醢飽滋味

已覺瓜瓠漫輪囷

君家水茄白銀色殊勝園裏紫彭亨蜀人生疎不下箸
吾與北人俱眼明

白金作顆非推成中有椎栗嚼白冰戎州夏畦少蔬供
感君來飯在家僧

畦丁收盡垂露實葉底猶藏十二三待得銀包已成殼
更當乞種過江南

送石長卿太學秋補

長卿家亦但四壁文君窺之介如石甯中已無少年事
骨氣乃有老松格漢文新覽天下圖詔山採玉淵獻珠
再三可陳治安策第一莫上登封書

贈知命弟離戎州

道人終歲學陶朱西子同舟泛五湖船窻卧讀書萬卷
還有新詩來起予

姪拒隨知命舟行

莫去沙邊學釣魚莫將百丈作轆轤清江濯足窻下坐

燕子日長宜讀書

次韻黃斌老所畫橫竹

酒澆胷次不能平吐出蒼竹歲崢嶸卧龍偃蹇雷不驚
公與此君俱忘形晴窻影落石泓處松煤淺染飽霜兔
中安三石使屈蟠亦恐形全便飛去

次韻謝斌老送墨竹十二韻

古今作生竹能者未十輩吳生勒枝葉筌宋遠不逮江
南鐵鉤鎖最許誠懸會燕公洒墨成落落與時背譬如

剗心松中有歲寒在湖州三百年筆與前哲配規權轉
銀鈎幽賞非俗愛披圖風雨入咫尺莽蒼外吾子學湖
州師逸功已倍有來竹四幅冬夏生變態預知更入神
後出遂無對吾詩被壓倒物固不兩大世傳江南李王
作竹自根至梢
極小者一一鈎勒成謂之鐵鈎
鎖自云惟柳公權有此筆法

用前韻謝子舟為予作風雨竹

子舟詩書客畫手睨前輩挹袂拍其肩餘力左右逮摩
拂造化爐經營鬼神會光煤疊亂葉與世作者背看君

回腕筆猶喜漢儀在歲寒十三本與可可追配小山蒼
苔面突兀謝僧愛風斜兼雨重意出筆墨外吾聞絕一
源戰勝自十倍榮枯轉時機生死付交態狙公倒七芻
勿用嗔喜對此物當更工請以小喻大

再用前韻詠子舟所作竹

森削一山竹壯士十三輩自干雲天去草芥宵下逮虛
心聽造物顛沛風雲會榮枯偶同時終不相棄背誰云
湖州沒筆力今尚在阿筌雖墨妙好以桃李配國工裁

主意冷淡恐不愛子舟落心畫榮觀不在外耆年道機
熟增勝當更倍祖述今百家小紙弄姿態雖云出湖州
卷置懶開對非公筆如椽孰能為之大

桃李一作竹鶴

戲詠子舟畫兩竹兩鸚鵡

風晴日暖搖雙竹竹間相語兩鸚鵡鸚鵡之肉不可肴
人生不材果為福子舟之筆利如錐千變萬化皆天機
未知筆下鸚鵡語何如夢中胡蝶飛

次韻荅斌老病起獨游東園二首

萬事同一機多慮乃禪病排悶有新詩忘蹄出兔還蓮
花生淤泥可見嗔喜性小立近幽香心與晚色靜

主人心安樂花竹有和氣時從物外賞自益酒中味
斷枯蟻改穴掃籜筍迸地萬籟寂中生乃見風雨至

又和二首

西風塵殘暑如用霍去病疎溝滿蓮塘掃葉明竹
逕中有寂寞人自知圓覺性心猿方睡起一笑六
憲靜

外物攻伐人鐘鼓作聲氣待渠弓箭盡我自味無
味宴

安衽席間蛟鱷垂涎地君子履微霜即知堅冰至

又荅斌老病愈遣悶二首

百病從中來悟罷本非病西風將小雨涼入居士逕苦
竹遶蓮塘自悅魚鳥性紅粧倚翠蓋不點禪心淨

風生高竹涼雨送新荷氣魚遊悟世網鳥語入禪味一
揮四百病智刃有餘地病來每厭客今乃思客至

從斌老乞苦笋

南園苦笋味勝肉籜龍稱寃莫採錄煩君更致蒼玉束

明日風雨皆成竹

更致一作便致

楊明叔惠詩格律詞意皆薰沐去其舊習予為之
喜而不寐文章者道之器也言者行之枝葉也故
次韻作四詩報之耕禮義之田而深其耒明叔言
行有法當官又敏於事而卹民故予期之以遠者
大者

魚去游濠上鶚來止坐隅吉凶終我在憂樂與生俱決
定不是物方名大丈夫今觀由也果老子欲乘桴

終我在

作唯
我在

道常無一物學要反三隅喜與嗔同本嗔時喜自俱心
隨物作宰人為我非夫利用兼精義還成到岸桴

為我一作

我謂

全德備萬物大方無四隅身隨腐草化名與太山俱道
學歸吾子言詩起老夫無為蹈東海留作濟川桴

匹士能光國三屨不滿隅竊觀今日事君與古人俱氣
類罵求友精誠石望夫雷門震驚手待汝一援桴

庭堅老懶衰情多年不作詩已忘其體律因明叔
有意於斯文試舉一綱而張萬目蓋以俗為雅以
故為新百戰百勝如孫吳之兵棘端可以破鏃如
甘蠅飛衛之射此詩人之奇也明叔當自得之公
眉人鄉先生之妙語震耀一世我昔從公得之為
多故今以此事相付

窮奇投有北鴻鵠止丘隅我已羈魅禦君方燕雀俱道
應無芥蒂學要盡工夫莫斬猿狙杙明堂待棟桴

楊明叔從予學問甚有成當路無知音求為廬州
從事而不能得予蒙恩東歸用蛟龍得雲雨鵬鷃
在秋天作十詩見餞因用其韻以別

平津善牧豕飲飛能斬蛟終藉一汲黯淮南解兵交楊
子有直氣未忍死草茅引之入漢朝誰為續弦膠

楊君清渭水自流濁涇中今年貧到骨豪氣似元龍男
兒生世間筆端吐白虹何事與秋螢爭光蒲葦叢

事隨世滔滔心欲自得得楊君為已學度越輩流百坐

捫故衣蝨垢襪春汗黑睥睨紉袴兒可飲三斗墨

清靜草元學西京有子雲太尉死宗社大鳥泣其墳寂
寞向千載風流被仍昆富貴何足道聖處要策勲

桑輿金石交既別十日雨子輿裹飯來一笑相告語揚
子困簞瓢諸公不能舉儻可從我歸沙頭駐鳴臚

山園少天日狐鬼能作妖睽閃載一車獵人用鳴臚小
智窘流俗蹇淺不能超安得萬里沙霜晴看射鵰

元之如砥柱大年若霜鷄王楊立本朝與世作郭郭觀

公有膽氣似可繼前作丈夫存遠大胃次要落落

虛心觀萬物險易極變態皮毛剝落盡惟有真實在侍
中乃珥貂御史則冠豸照影或可羞短蓑釣寒瀨

松柏生澗壑坐閱草木秋金石在波中仰看萬物流骭

骭自骭骭伊優自伊優但觀百歲後傳者非公侯

骭一作元

老作同安守蹇足信所便胸中無水鏡敢當吏部銓恨
此虛名在未脫世糾纏夢作白鷗去江南水如天

題榮州祖元大師此君軒

王師學琴三十年響如清夜落澗泉滿堂洗盡箏琶耳
請師停手恐斷絃神人傳書道人命死生貴賤如看鏡
晚知直語觸憎嫌深巖幽寺聽鐘磬有酒如渾客滿門
不可一日無此君當時手栽數寸碧聲挾風雨今連雲
此君傾蓋如故舊骨相奇怪清且秀程嬰杵曰立孤難
伯夷叔齊采薇瘦霜鐘堂上弄秋月微風入絃此君說
公家周彥筆如椽此君語意當能傳

青神縣尉廳葺城頭舊屋作借景亭下瞰史家園

水竹終日寂然了無人迹又當大木綠陰之間戲
作長句奉呈信孺明府介卿少府

青神縣中得兩張愛民財物唯恐傷二公身安民乃樂
新葺城頭六月涼竹鋪不浣吳綾襪東西開軒蔭清樾
當官借景未傷民恰似鑿池取明月

戲贈家安國

家侯口吃善著書常願執戈王前驅朱紱蹉跎晚監郡
吟弄風月思天衢二蘇平生親且舊少年筆硯老梧酒

但使一公轉鴻鈞此老矍鑠還冠軍

題石恪畫嘗醋翁

石媪忍酸喙三尺石皤嘗味面百摺誰知聳膊寒至骨
圖畫不減吳生筆

題子瞻畫竹石

風枝雨葉瘠土竹龍蹲虎踞蒼蘚石東坡老人翰林公
醉時吐出胸中墨

題晁以道雪鴈圖

飛雪灑蘆如銀箭前鴈驚飛後回盼憑誰說與謝元暉
休道澄江靜如練

贈惠洪

吾年六十子方半槁項頂螺忘歲年韻勝不減秦少覲
氣爽絕類徐師川不肯低頭拾卿相又能落筆生雲煙
脫却衲衫一作衣著蓑笠來佐涪翁刺釣船

山谷集卷六

欽定四庫全書

山谷集卷七

宋 黃庭堅 撰

古詩五十二首

律詩
二首

和王觀復洪駒父謁陳無已長句

陳君今古焉不學清渭無心映涇濁漢官舊儀重九鼎
集賢學士見一角王侯文采似於菟洪甥人間汗血駒
相將問道城南隅無屋止借官船居有書萬卷繞

一作
纔

四壁樵蘇不爨談至夕主人自是文章伯鄰里頗怪有
此客食貧各仕天一方佳人可思不可忘河從天來砥
柱立愛莫助之涕淋浪

杜一
作在

以古銅壺送王觀復

隨俗易汨沒從公常糾紛我觀王隆化入籓不改薰未
見蛇起陸已看豹成文愛君古人風古壺投贈君酌酒
時在傍可用弭楚氣問君何以報直諒與多聞

王充道送水仙花五十枝欣然會心為之作詠

淩波仙子生塵襪水上輕盈步微月是誰招此斷腸魂
種作寒花寄愁絕含香體素欲傾城山礬是弟梅是兄
坐對真成被花惱出門一笑大江橫

次韻益修四弟

霜晚菊未花節物亦可嘉欣欣登高侶畏雨占暮霞

諺云

朝霞不出門
暮霞行千里

楚人醞菹豆輕碧自相誇老夫不舉酒噉

噉鳴兩車良辰與美景客至但成嗟

以峽州酒遺益修復繼前韻

令節不把酒新詩徒拜嘉頗憶宋玉賦登高氣成霞渚
宮但衰柳朝雲為誰誇吾宗懷古恨流涎過麴車一壺
澆往事聊送解愁嗟

解一作耐

病起荆江亭即事十首

翰墨場中老伏波菩提坊裏病維摩近人積水無鷗鷺
時有歸牛浮鼻過

維摩老子五十七天子大聖初元年傳聞有意用幽側
病著不能朝日邊

禁中夜半定天下仁風義氣徹脩門十分整頓乾坤了
復辟歸來道更尊

成王小心似文武周召何妨畧不同不須要出我門下
實用人材即至公

司馬丞相昔登庸招用元老超羣公楊綰當朝天下喜
斷碑零落臥秋風

昔登庸一作驟登庸

死者已死黃霧中三事不數兩蘇公豈謂高才難駕御

空歸萬里白頭翁

謂一作爲

文章韓杜無遺恨
草詔陸贄傾諸公
玉堂端要真學士
須得儋州禿鬚翁

閉門覓句陳無已
對客揮毫秦少游
正字不知溫飽未

西風吹淚古藤州

吹一作揮

張子耽酒語蹇吃
聞道潁州又陳州
形模彌勒一布袋
文字江河萬古流

魯中狂士邢尚書
本意扶日上天衢
惇夫若在鐫此老
不令平地生崎嶇

謝荅聞善二兄九絕句

身入醉鄉無畔岸心與歡伯為友朋更闌驀坐客星散
午過未蘇髮鬢髻

未嘗頃刻可去酒無有一日不吟詩詩狂克念作酒聖
意態忽如年少時

羣猪過飲尚可醉疥手輟甕庸何傷柳家兄弟太迫窄
狂藥不容人發狂

莫作器號驚四鄰甕中有地可藏真淵明醉握遠公手

大笑絕倒人不嗔

阮籍醉睡不論昏劉伶雞肋避尊拳至今凜凜有生氣
飲酒真成不愧天

公擇醉面桃花紅人百忤之無愠容莘老夜闌傾數斗

焚香默坐日生東

李公擇尚書
孫莘老中丞

推牀破面振觸人作無義語怒四鄰尊中歡伯笑爾輩
我本和氣如三春

陶令舍中有名酒無夕不為父老傾四坐歡欣觀酒德

一燈明暗又詩成

阮籍劉伶智如海人間有道作糟丘酒中無諍真三昧
更覺嵇康輸一籌

戲呈聞善

堆氈病鶴怯雞羣見酒特地生精神坐中索起時被肘
亦任傍人嫌我真

劉邦直送水仙花

錢塘昔聞水仙廟荊州今見水仙花暗香靚色撩詩句

宜在林逋處士家

錢塘有水仙王廟林和靖祠堂近之東坡先生以為和靖清節映世遂移

神像配食水仙王云

次韻向和卿行松滋縣與鄒天錫夜語南極亭二

首

雪泥滑滑到山郭提壺勸沽亦不惡林中解道不如歸
家人應念思歸樂

衝風衝雨走七縣唯有白鷗盟未寒坐中更得江南客
開盡南牕借月看

戲簡朱公武劉邦直田子平五首

不趨吏部曹中版且繪高沙湖裏魚雖無季子六國印
要讀田郎萬卷書

歡伯可解藜藿嘲孔方定非金石交君看劉郎最多智
昨者火事幾焚巢

劉郎好詩又能文方我奔竄義甚敦為親未塋走人門
閉門却掃不足論

朱家墳麓好兄弟陋巷六經葵菑秋我卜荊州三畝宅

讀田家書從之游

朱公趨朝瘦至骨歸來豪健踞胡牀日看省曹閣者面
何如田家侍兒妝

戲詠暖足餅二首

少姬煖足臥或能起心兵千金買脚婆夜夜睡天明
脚婆元不食纏裹一衲足天明更傾瀉頰面有餘燠

鄒松滋寄苦竹泉橙麴蓮子湯三首

松滋縣西竹林寺苦竹林中甘井泉巴人謾說蝦蟇焙

試裹春芽來就煎

天將金闕真黃色借與洞庭霜後橙松滋解作逡巡麴
壓倒江南好事僧

新收千百秋蓮萼剥盡紅衣搗玉霜不假參同成氣味
跳珠碗裏綠荷香

次韻荅黃與迪

和氏有尺璧楚國無人知青山抱國器歲月忽如遺但
使玉非石果有遭逢時吾宗固神秀天乃晚成之蘭芳

深九畹露味挹三危流俗不顧省古人可前追胸中凌
雲賦自貴知音稀淵源學未淺孝友家正肥與世殊軌
轍三黜理亦宜吳溪浣紗女不用朱粉施豈伊風塵子
市門自夸毗我作楚道囚三年始放歸邂逅終日語貽
我五字詩句如秋雨晴遠峯抹脩眉老馬甘伏櫪坐看
天驥馳灑掃清樾下當為果茗期光陰去易失日月轉
兩儀仲氏有東園花竹深可依寸步不往來千里常夢
思幾時開後戶扶策方自茲

次前韻謝與迪惠所作竹五幅

吾宗墨修竹心手不自知天公造化鑪攬取如拾遺風
雪煙霧雨榮悴各一時此物抱晚節君又潤色之抽萌
或發石懸簷有貼危林梢一片雨造次以筆追猛吹萬
籟作微涼大音稀霜兔束豪健松煙泛硯肥盤桓未落
筆落筆必中宜今代捧心學取笑如東施或可遺巾幘
選懦如辛毗生枝不應節亂葉無所歸非君一起予衰
病豈能詩憶君初解鞍新月挂彎眉夜來上金鏡坐歎

光景馳我有好素綃晴明要會期漪漪淇園姿此君有
威儀願作數百竿水石相因依他年風動壁洗我別後
思開圖慰滿眼何時遂臻茲

題胡逸老致虛庵

藏書萬卷可教子遺金滿籬常作灾能與貧人共年穀
必有明月生蚌胎山隨宴坐畫圖出水作夜牕風雨來
觀山觀水皆得妙更將何物污靈臺

一作莫將世事侵
兩鬢小庵觀靜鏤

靈臺

題蓮華寺

狂卒猝起金坑西脅從數百馬百蹄所過州縣不敢誰
肩輿虜載三十妻孥生有膽無智畧謂河可馮虎可搏
身膏白刃浮屠前此鄉父老至今憐

衝雨向萬載道中得逍遙觀遂託宿戲題

逍遙近道邊憩息慰億億晴暉時晦明諠語諧謹論草
萊荒蒙龍室屋壅塵坐僕僮侍偈仄涇渭清濁混

題竹尊者軒

平生脊骨硬如鐵聽風聽雨隨宜說
百尺竿頭放步行
更向脚跟參一節

送密老住五峯

我穿高安過萍鄉七十二渡遶羊腸
水邊林下逢衲子
南北東西古道場
五峯秀出雲雨上
中有寶坊如側掌
去與青山作主人
不負法昌老禪將
栽松種竹是家風
莫嫌斗絕無來往
但得螺師吞大象
從來美酒無深巷

一本羊腸下有兩句云去時攜
茗奉正香歸來秧稻夏日長

拜劉凝之畫像

棄官清潁尾買田落星灣身在菰蒲中名滿天地間誰能四十年保此清淨退往來澗谷中神光射牛背

跋子瞻和陶詩

子瞻謫嶺南時宰欲殺之飽喫惠州飯細和淵明詩彭澤千載人東坡百世士出處雖不同風味乃相似

東坡云古

之詩人有擬古之作矣未有追和古人者也追和古人則始於東坡吾於詩人無所甚好獨好淵明其詩質而實綺靡而實腴自曹劉鮑謝李杜諸人皆莫及也吾前後和其詩凡一百有九篇至其得意自謂不甚愧淵明

然吾之於淵明豈獨好其詩也哉如其為人實有感焉
淵明臨終疏告儼等吾少而窮苦每兼以家弊東西遊
走性剛才拙與物多忤自量為已必貽俗患僂僂辭世
使汝等幼而飢寒淵明此語蓋實錄也吾真有此病而
不蚤自知半生出仕以犯世患此所以
深愧淵明欲以晚節師範其萬一也

題李亮功戴嵩牛圖

寅公

韓生畫肥馬伏仗有輝光戴老作瘦牛平生一作千頃

荒穀鯨告主人實已盡筋力乞我一牧童林間聽橫笛

次蘇子瞻和李太白潯陽紫極宮感秋詩韻追懷

太白子瞻

不見兩謫仙長懷倚脩竹行遶紫極宮明珠得盈掬平
生人欲殺耿介受命獨往者如可作抱被來同宿砥柱
閱頽波不疑更何卜但觀草木秋葉落根自復我病二
十年大斗久不覆因之酌蘇李蠲肥社醅熟

瓊芝軒

卓僊在時養瓊芝深根固蒂活人命憧憧來問此何草

但告渠是唐婆鏡

子瞻詩所記胡道士玉芝一名瓊田
草者俗號其葉為唐婆鏡葉底開花

故號羞天花以予考之其實本草之鬼臼也歲生一白
如黃精而堅瘦滿二十歲可為藥就土中生根取一白

勿令大本知也煮麵如餠餠皮裏一白吞之數日不飢
啗三白可辟穀也黃龍山老僧多採而斷食令人體臞
而神王今方家所用鬼白乃鬼燈檠耳如蜀人用鬼箭
但用一草根不知何物也鎮陽趙州間道傍叢生三羽
者真鬼箭俗醫用藥如此而責古方不治病可勝歎哉
因論玉芝故并記之以遺胡道士道士胡君洞微卓君
玘之弟子卓君之時欲崇飾宮觀而俗緣薄規模甚遠
而不成就及胡君而宮殿崇成便齋曲房松竹薈蔚觀
其軒憲開塞宜冬而愜夏智慮通物者也又好文多藝
能治賓客具至者忘歸此東坡先生所以每至而留連
歟者

龜穀軒

紫極宮中三百楹道人獨藏一神屋開軒納息星月明

時有白雲來伴宿

秋聲軒

誰居空閒扇素鑰情與無情並時作是聲皆自根極來
更莫辛勤問南郭

次韻徐仲車喜董元達訪之作南郭篇四韻

董侯從軍來意望名不朽款門拜徐公在德不在酒徐
公雖避俗對客輒粲然耳不聞世事時誦陶令篇

次韻仲車為元達置酒四韻

射陽三萬家莫貴徐公門誰能拜牀前況乃共酒樽唯
此醉中趣難為醒者論盜臥月皎皎雞鳴雨昏昏

次韻仲車因婁行父見寄之詩

前朝老諸生大半正丘首投荒萬里歸煩公問健否往
時望江宰今為夏津吏他日可教之玉音尚無棄

山谷集卷七

欽定四庫全書

集部
山谷集卷八至十

詳校官庶吉士臣胡鈺

檢討臣何思鈞覆勘

總校官進士臣朱鈐

校對官編修臣盧遂

謄錄監生臣康又民

欽定四庫全書

山谷集卷八

宋 黃庭堅 撰

古詩五十首

武昌松風閣

依山築閣見平川，夜闌箕斗插屋椽。
我來名之意適然，老松魁梧數百年。
斧斤所赦今參天，風鳴鳩皇五十絃。
洗耳不須菩薩泉，嘉二三子甚好賢。
力貧買酒醉此筵。

夜雨鳴廊到曉懸相看歸臥僧氈泉枯石燥復潺湲
山川光輝為我妍野僧早飢不能飧曉見寒谿有炊煙
東坡道人已沈泉張侯何時到眼前釣臺驚濤可晝眠
怡亭看篆蛟龍纏安得此身脫拘攣舟載諸友長周旋

次韻文潛

武昌赤壁弔周郎寒溪西山尋漫浪忽聞天上故人來
呼船凌江不待餉我瞻高明少吐氣君亦歡喜失微恙
年來鬼祟覆二豪詞林根柢頗搖蕩天生大材竟何用

只與千古拜閣像張侯文章殊不病歷險心膽元自壯
汀洲鴻鴈未安集風雪戶牖當塞向有人出手辦茲事
政可隱几窮諸妄經行東坡眠食地拂拭寶墨生楚愴
水清石見君所知此是吾家秘密藏

閣像一作遺像

宿黃州觀音院鐘樓上

鐘鳴山川曉露下星斗濕老夫梳白頭潘何墳麓集

謝何十三送鱗顓

形模雖入婦女笑風味可解壯士顏寒蒲束縛十六輩

已覺酒興生江山

崇寧二年正月己丑夢東坡先生於寒溪西山之間予誦寄元明觴字韻詩數篇東坡笑曰公詩更進於曩時因和予一篇語意清奇予擊節歎賞東坡亦自喜於九曲嶺道中連誦數過遂得之

天教兄弟各異方不使新年對舉觴作雲作雨手翻覆得馬失馬心清涼何處胡椒八百斛誰家金釵十二行一丘一壑可曳尾三沐三爵取刳腸

次韻吳可權題餘干縣白雲亭

曩誰築孤亭勝日有感遇永懷劉隨州因榜白雲句遺
老不能談歲月忽成屢綠陰斤斧盡華屋風雨仆吳侯
七閩英宰縣有真趣絃歌解民愠根節去吏蠹材收佛
宮餘工有子來助屢成燕雀賀水滿鳬鴈翥四海名士
來一笑佳客聚雲興碧山留雲隨清江去斯須成蒼狗
皆道不如故至人觀萬物誰有安丘處寄語吳令君但

遣糟牀注

新陳一作歲月雲興一作雲與雲隨一作雲散

鄂州節推陳榮緒惠示沿檄崇陽道中六詩老懶
不能追韻輒自取韻奉和

頭陀寺

頭陀全盛時宮殿梯空級城中望金碧雲外僧
職職人亡經禪盡屋破龍象泣唯有簡栖碑文
章巋然立

道中間松聲

蟠空作風雨發地鳴鼓吹日晴四無人聲在高
林際伊優兒女語寒淺市井議我欲抱七絃寫
此以卒歲

中秋山行懷子興節推

俗物常偏塞令人眼生白永懷洛陽人談詩論畫壁書

山吐秋月阻作南樓客但歌靡盬詩賞此無瑕壁

眼生白一

作眼生角

再登蓮落嶺懷君澤知錄

邑下羹不和幕中往調護紛爭非士則各使捐細故頗
憶郝參軍能令公喜怒應知執掌車歷盡崔嵬路

崇陽道中

張公少為令慙俗有遺書左販洞庭橘右擔彭蠡魚歌
奔中夜女歸抱十年雛借韻一近歲多儒學仁風似有初

晚發咸寧行松徑至蘆子

咸寧走蘆子終日喬木陰太丘心歷落古松韻清深聊
持不俗耳靜聽無絃琴非今胡部律而獨可人心

庭堅以去歲九月至鄂登南樓歎其制作之美成

長句久欲寄遠因循至今書呈公悅

惺

江東湖北行畫圖鄂州南樓天下無高明廣深勢抱合

表裏江山來畫閣雪筵披襟夏簟寒宵吞雲夢何足言
庾公風流冷似鐵誰其繼之方公悅

閣一作閣

養鬪雞

崢嶸已介季氏甲更以黃金飾兩戈雖有英心甘鬪死
其如紀消木雞何

顏徒樂貧二首

衡門低首過環堵容膝坐四旁無給侍百衲自纏裹論
事直如絃觀書曲肱卧飢來或乞食有道無不可

小山作友朋義重子輿桑香草當姬妾不須珠翠粧烏
烏窺凍硯星月入幽房兒報無炊米浩歌繞屋梁

以酒渴愛江清作五小詩寄廖明畧學士兼簡初

和父主簿

正一
虞世

將發沔鄂間盡醉竹林酒二三名友輩未肯棄老朽借
問坐客誰盧溪紫髯叟此翁今惜醉舊不論升斗

平生思故人江漢不解渴誰言故逐地燒燭飲至跋扈
予先狗馬勸以愛膚髮有罪當竄流但懼不得活

廖侯勸我酒此亦雅所愛中年剛制之常懼作灾怪連
臺盤拗倒故人不思貸誰能知許事痛飲且一快

竹林文章伯國士無與雙比來少制作非以弱故降景
陽機中錦猶衣被丘江時時能度曲秀句入新腔

斯人絕少可白眼視公卿每與俗物逢三沐取潔清我
亦漫浪者君何許同盟試問盧溪叟猶得多可名

四休居士詩

并序

太醫孫君昉字景初為士大夫發藥多不受謝自號

四休居士山谷問其說四休笑曰麤茶淡飯飽即休
補破遮寒暖即休三平二滿過即休不貪不妬老即
休山谷曰此安樂法也夫少欲者不伐之家也知足
者極樂之國也四休家有三畝園花木鬱鬱客來煮
茗傳酒談上都貴游人間可喜事或茗寒酒冷賓主
皆忘一本有倦字其居與予相望暇則步草徑相尋故作
小詩遺家僮歌之以侑酒茗其詩曰

富貴何時潤髑髏守錢奴與抱官囚太醫診得人間病

安樂延年萬事休

無求不著看人面有酒可以留人嬉欲知四休安樂法
聽取山谷老人詩

一病能惱安樂性四病長作一生愁借問四休何所好
不令一點上眉頭

過洞庭青草湖

乙丑越洞庭丙寅渡青草似為神所憐雪上日杲杲我
雖貧至骨猶勝杜陵老憶昔上岳陽一飯從人討行矣

勿遲留蕉林追獨獠

晚泊長沙示秦處度范元實用寄明略和父韻五

首

湛
溫

昔在秦少游許我同門友掘獄無張雷劒氣在牛斗今
來見令子文似前哲有何用相澆潑清江淥如酒

范公太史僚山立乃先達發揮百代史管以六經轄授
身轉嶺海就木乃京洛仲子見長沙且用慰飢渴

秦郎水江漢范郎器鼎鼐逝者不可尋猶喜二子在相

逢唾珠玉貧病問薪菜豫愁帆風船目極別所愛
往時高交友宰木已樅樅今我二三子事業在燈牕秦
范波瀾濶笑陸海潘江願茲秉經術出仕榮家邦

少游五十策其言明且清筆墨深關鍵開闔見日星陳

友評斯文如鐘磬鼓笙誰能續鳳鳴洗耳聽兩甥

秦范相
謂為甥

次韻元實病目

道人嘗恨未灰心儒士苦愛讀書眼要須玄覽照鏡空
莫作白魚鑽蠹簡閱人朦朧似有味看字昏濫尤宜懶

范侯年少百夫雄言行一一無可揀
看君眸子當瞭然
乃稱胃次常坦坦如何有物食明月
淚睫墮珠衣袖滿
金篦刮膜會有時湯熨取快術誠短
君不見岳頭懶攢
一生禪鼻涕垂頤渠不管

勝業寺悅亭

一作阻
雨福巖

苦雨已解嚴諸峯來獻狀不見白頭禪
空依紫藤杖

離福巖

山下三日晴山上三日雨不見祝融峯
還泝瀟湘去

花光仲仁出秦蘇詩卷思兩國士不可復見開卷
絕嘆因花光為我作梅數枝及畫煙外遠山追少
游韻記卷末

夢蝶真人貌黃稿籬落逢花須醉倒雅聞花光能畫梅
更乞一枝洗煩惱扶持愛梅說道理自許牛頭參已早
長眠橘洲風雨寒今日梅開向誰好何況東坡成古丘
不復龍蛇者揮掃我向湖南更嶺南繫船來近花光老
歎息斯人不可見喜我未學霜前草寫盡南枝與北枝

更作千峯倚晴昊

書磨崖碑後

春風吹船著硿活溪扶藜上讀中興碑平生半世看墨
本摩挲石刻鬢如絲明皇不作苞桑計顛倒四海由祿
兒九廟不守乘輿西萬官已作烏擇栖撫軍監國太子
事何乃趣取大物為事有至難天幸爾上皇跼蹐還京
師內間張后色可否外間李父頤指揮南內淒涼幾苟
活高將軍去事尤危臣結春陵二三策臣甫杜鵑再拜

詩安知忠臣痛至骨世上但賞瓊琚詞同來野僧六七
輩亦有文士相追隨斷崖蒼蘚對久立凍雨為洗前朝
悲

浯溪圖

成子寫浯溪下筆便造極空濛得真趣膚寸已千尺只
今中宮寺在昔漫郎宅更作老夫船檣竿插蒼石

太平寺慈民閣

晚與曾公
袞同登

青玻璃盆插千岑湘江水清無古今何處拭目窮表裏

太平飛閣暫登臨
朝陽不聞皂蓋下
愚溪但有古木陰
誰與洗滌懷古恨
坐有佳客非孤斟

題淡山巖二首

去城二十五里近
天與隔盡俗子塵
春蛙秋蠅不到耳
夏涼冬暖總宜人
巖中清磬僧定起
洞口綠樹仙家春
惜哉次山世未顯
不得雄文鑱翠珉

淡山淡姓人安在
徵君避秦亦不歸
石門竹徑何時有
瓊臺瑤室至今疑
回中明潔坐十客
亦可呼樂醉舞衣

閬州城南果何似
永州淡巖天下稀

明遠庵

遠公引得陶潛住
美酒沽來飲無數
我欲醉眠卿且去
只有空瓶同此趣
誰知明遠似遠公
亦欲我行庵上路
多方挈取甕頭春
大白梨花十分注
與君深入逍遙游
了無一物當情素
道卿道卿歸去來
明遠主人今進步

道卿浩
溪僧

去年三月清明
蔣彥回喜太守
監郡過其玉芝園

作詩十六韻二侯皆有報章今年三月余到玉芝園記錄一時次其舊韻

春生瀟湘水風鳴澗谷泉過雨花漠漠弄晴絮翩翩名園上朱閣觀後復觀前借問昔居人岑絕無炊煙人生須富貴河水清且漣百年共如此安用涕潺湲蔣侯真好事杖屨喜接連車載溪中骨堆排若差肩厭者孔壬面醜石反成妍感君勸我醉吾亦無間然亂我朱碧眼空花墜便翾行動須人扶那能金石堅愛君雷式琴湯

湯發朱絃但恨賞音人大半隨逝川平生有詩罪如瘡
不可痊今當痛自改三疊復三前

三月辛丑同徐靖國到愚溪過羅氏脩竹園入朝
陽洞蔣彥回陶介石僧崇廣及余子相步及余於
朝陽巖裴回水濱久之有白雲出洞中散漫洞口

咫尺欲不相見介石請作五字記之

裴一作徘徊

意行到愚溪竹輿鳴擔肩冉溪昔居人埋沒不知年偶
託文字工遂以愚溪傳柳侯不可見古木蔭賤賤羅氏

家瀟東瀟西讀書園笋出不避道檀藥搖春烟下入朝
陽巖次山有銘鐫鮮石破篆文不辨瞿李表嵌竇鑾瑩
磬洞中出寒泉同遊四五客拂石弄潺湲俄頃生白雲
似欲駕我仙吾將從此逝挽牽遂回船

代書寄翠巖新禪師

山谷青石牛自負萬鈞重八風吹得行處處是日用又
將十六口去作宜州夢苦憶新老人是我法梁棟信手
斫方圓規矩一一中遙思靈源叟分坐法席共聊持楚

狂句往作天女供嶺上早梅春參軍慙獨弄

戲答歐陽誠發奉議謝余送茶歌

歐陽子出陽山山竒水怪有異氣生此突兀熊豹顏飲
如江入洞庭野詩成十手不供寫老來抱璞向涪翁東
坡元是知音者蒼龍壁官焙香涪翁投贈非世味自許
詩情合得嘗却思翰林來餽光祿酒兩家水鑒共寒光
予乃安敢比東坡有如玉槃金叵羅直相千萬奚啻過
愛公好詩又能多老夫何有更橫戈奈此于思百戰何

到桂州

桂嶺環城如鴈蕩平地蒼山忽嵒峨李成不在郭熙死
奈此百嶂千峯何

以椰子茶瓶寄德孺二首

碩果實林梢可以代懸匏攜持二十年煮茗當酒肴我
今禦魑魅學打衲僧包聊持堅重器遺我金石交

炎丘椰木實入用隨茗椀譬如楮石罌但貴從來遠往
時萬里物今在籬落間知公一拂拭想我瘴霧顏

和范信中寓居崇寧遇雨二首 寥

范公來尋八桂路走避俗人如脫兔衣囊夜雨寄禪家
行潦升階漂兩屨遣悶悶不離眼前避愁愁已知人處
慶公憂民苗未立旻公憂水水推去兩禪有意開壽域
歲晚築室當百堵他時無屋可藏身且作五里公超霧
當年游俠成都路黃犬蒼鷹伐孤兔二十始肯為儒生
行尋丈人奉巾屨千江渺然萬山阻抱衣一囊遍處處
或持劔掛牢上回亦有酒罷壺中去昨夜禪榻寄曲肱

上雨傍風破環堵何時鯢化北溟波好在豹隱南山霧

乞鍾乳於曾公衮

糾

寄語曾公子金丹幾時熟願持鍾乳粉實此聲懸腹遙
憐鱗眼湯已化鵝管玉刀圭勿妄傳此物非碌碌

山谷集卷八

欽定四庫全書

山谷集卷九

宋 黃庭堅 撰

律詩九十二首

東觀讀未見書

已下擬省
題四首

漢規羣玉府東觀近宸居
詔許無雙士來觀未見書
皇文開萬卷家學陋三餘
竹帛森延閣星辰繞直廬
諸生起孤賤天子自吹噓
願以多聞力論思補帝裾

歲寒知松柏

羣陰彫品物松柏尚桓桓老去惟心在相依到歲寒霜
嚴御史府雨立大夫官犧象溝中斷徽絃爨下殘光陰
一鳥過斬一作剪伐萬牛難春日輝桃李蒼顏亦預觀

被褐懷珠玉

國士懷珠玉通津不易扛積藏心有待褐短義難降寶
唾歸青簡晴虹貫夜窓直言方按劍豈是故迷邦彈雀
輕千仞連城買一雙安知藍縷底明月弄寒江

款塞來享

前朝夏州守來款塞門西聖主敷文德降書付狄鞬
裘瞻日月務面帶金犀殿陛間干羽邊亭息鼓聲永輸
量谷馬不作觸藩羝聲勢常相倚今聞定五溪

送舅氏野夫之宣城二首

李華

藉甚宣城郡風流數貢毛霜林收鴨脚春網薦琴高共
理須良守今年輟省曹平生割雞手聊試發硎刀

試說宣城郡停盃且細聽晚樓明宛水春騎簇昭亭櫂

極豐圩戶桁楊卧訟庭謝公歌舞處時對換驚經

王聖美三子補中廣文生

子韶

王家人物從來遠今見諸孫總好賢三級定知魚尾進
一鳴已作鴈行連愧無藻鑑能推轂願卷囊書當贈錢
歸去雄誇向兒姪舍中犢子賸狂顛

謝王炳之惠香鼎

薰鑪宜小寢鼎製琢晴嵐香潤雲生礎煙明虹貫巖法
從空處起人向鼻頭參一炷聽秋雨何時許對談

次韻柳通叟寄王文通

故人昔有凌雲賦，何意陸沈黃綬間。
頭白眼花行作吏，兒婚女嫁望還山。
心猶未死杯中物，春不能朱鏡裏顏。
寄語諸公肯湔袂，割雞令得近鄉關。

次韻王定國揚州見寄

清洛思君晝夜流，北歸何日片帆收。
未生白髮猶堪酒，垂上青雲却佐州。
飛雪堆盤鱸魚腹，明珠論斗煮雞頭。
平生行樂自不惡，豈有竹西歌吹愁。

寄黃幾復

乙丑年德平鎮作

我居北海君南海寄雁傳書謝不能桃李春風一杯酒
江湖夜雨十年燈持家但有四立壁治病不蕲三折肱
想得讀書頭已白隔溪猿哭瘴溪藤

次韻幾復和答所寄

海南北海夢不到會合乃非人力能地褊未堪長袖舞
夜寒空對短擎燈相看鬢髮時窺鏡曾共詩書更曲肱
作箇生涯終未是故山松長到天藤

次韻崔伯易席上所賦因以贈行二首

迎新與送故渠已不勝勤民賣腰間劒公寬柱後文諸
郎投賜沐高會惜臨分去國雖千里分憂即近君

老惜交情別追隨車馬勤臨朝思共理治郡復斯文訟

息常一作當休吏民貧更勸分西湖十頃月自比漢封君

同子瞻韻和趙伯充團練

金玉堂中寂寞人仙班時得共朝真兩宮無事安磐石
萬國歸心有老臣家釀可供開口笑侍兒工作捧心顰

醉鄉乃是安身處付與升平作幸民

送顧子敦赴河南三首

頭白書林二十年印章今領晉山川紫參可掘宜包貢
青鐵無多莫鑄錢勸課農桑誠有道折衝樽俎不臨邊
要知使者功多少看取春郊處處田

家在江東不繫懷愛民憂國有從來月斜汾沁催驛馬
雪暗岢嵐傳酒盃塞上金湯唯粟粒胸中水鏡是人才
遙知更解青牛句一寸功名心已灰

攬轡都城風露秋行臺無妄護衣篝虎頭墨妙能頻寄
馬乳葡萄不待求上黨地寒應強飲兩河民病要分憂
猶聞昔在軍興日一馬人間費十牛

寄上叔父夷仲三首

少年有功翰墨林中歲作吏幾陸沈庖丁解牛妙世故
監市履狶知民心萬里書來兒女瘦十月山行冰雪深
夢魂和月繞秦隴漢節落毛何處尋

艱難聞道有歸音部曲霜行壁月沈王春正月調玉燭

使星萬里朝天心頗令山海藏國用乃見縣官恤民深
經心隴蜀封疆守必有人才備訪尋

關寒塞雪欲嗣音燕雁拂天河鯉沈百書不如一見面
幾日歸來兩慰心弓刀陌上望行色兒女燈前語夜深
更懷父子東歸得手種江頭柳十尋

詠雪奉呈廣平公

宋 祖 盈

連空春雪明如洗忽憶江清水見沙夜聽疎疎還密密
曉看整整復斜斜風回共作婆娑舞天乃能開頃刻花

政使盡情寒至骨不妨桃李用年華

次韻宋楙宗僦居甘泉坊雪後書懷

漢家太史宋公孫漫逐班行謁帝闈
燕領封侯空有相蛾眉傾國自難昏
家移四壁書侵坐馬瘦三山葉擁門
安得風帆隨雪水江南石上對窪尊

馬瘦一作馬鮮

次韻宋楙宗三月十四日到西池都人盛觀翰林
公出遊

金絨繫馬曉鶯邊不比春江上水船
人語車聲喧法曲

花光樓影倒晴天
人間化鶴三千歲
海上看羊十九年
還作遨頭驕俗眼
風流文物屬蘇仙

次韻張昌言給事喜雨

三兩全清六合塵
詩翁喜雨句凌雲
埵漂戰蟻餘追北
柱擊垂龍有裂文
減去鮮肥憂玉食
徧宗河嶽起壚薰
聖功惠我豐年食
未有涓埃可報君

和答錢穆父詠猩猩毛筆

愛酒醉魂在能言
機事疎平生幾量
屐身後五車書物

色省王會勲勞在石渠拔毛能濟世端為謝楊朱

次韻奉酬劉景文河上見寄

省中岑寂坐雲牕忽有歸鴻拂建章珍重多情惟石友
琢磨佳句問潛郎遙憐部曲風沙裏不廢平生翰墨場
想見哦詩煮春茗向人懷抱去關防

見諸人唱和酴醿詩輒次韻戲詠

梅殘紅藥遲此物共春歸名字因壺酒風流付枕幃墜
鈿香徑草飄雪淨垣衣玉氣晴虹發沈材鋸屑霏直知

多不厭何忍摘令稀常恨金沙學顰時正可揮

次韻秦少章晁適道贈答詩

二子論文地陰風雪塞廬寧穿東郭履不奉子公書士
固難推挽時聞有詔除負暄真得計獻御恐成疎

陳留市隱

并序

陳留市中有刁鐻工與小女居得錢父子飲于市醉
則負其子行歌不通名姓江端禮傳其事以為隱者
吾友陳無已為賦詩庭堅亦擬作

市井懷珠玉往來終

一作斯人初

未逢柔肩嬌小女邂逅此

生同養性霜刀在閱人清鏡空時時能舉酒彈鋏送飛

鴻

嘲小德

中年舉兒子漫種老生涯學語囀春鳥塗牕行暮鴉欲

嗔王母惜稍慧女兒誇解著潛夫論不妨無外家

一作學語

春蟲貼書牕秋雁斜待渠能小艇伴我釣煙沙

清人怨戲效徐庾慢體三首

秋水無言度荷花稱意紅主人敬愛客催喚出房櫳一
斛明珠曲何時落塞鴻試煩春筭手聊為剥蓮蓬

一作剥萍蓬

障羞羅袂薄承汗領巾紅晚風斜蠆髮逸艷照牕櫳胡
琴抱明月寶瑟陣歸鴻倚壁生蛛網年光如轉蓬

翡翠釵梁碧石榴裙褶紅隙光斜斗帳香字冷薰籠聞
道西飛燕將隨北固鴻鴛鴦會獨宿風雨打船蓬

秋思寄子由

黃落山川知晚秋
小蟲催女獻功裘
老松閱世卧雲壑
挽著滄江無萬牛

子瞻去歲春夏侍立延英
子由秋冬間相繼入侍
作詩各述所懷予亦次韻四首

赤壁歸來入紫清
堂堂心在鬢彫零
江沙蹋破青鞵底
却結絲絢侍禁庭

胷蟠萬卷夜光寒
筆倒三江硯滴乾
大似不蒙稽古力
只今猶著侍臣冠

對掌絲綸罷記言職親黃屋傍堯軒雁行飛上猶回首
不受青雲富貴吞

樂天名位聊相似却是初無富貴心只欠小蠻樊素在
我知造物愛公深

再

初一作次韻四首

隆儒殿閣對橫經咫尺清都雨露零見說文星環北極
人間無路仰天庭

風櫺倒影日光寒堯日當中露正乾殿上給扶鳴漢履

螭頭簪筆見秦冠

萬國傾心天不言諸儒爭席異臨軒聖功典學昭歌頌
便覺曹劉不足吞

延和西路古槐陰不隔朝宗夙夜心公有胃中五色線
平生補袞用功深

次韻游景叔聞洮河捷報寄諸將四首

千仞谿中石轉雷漢家萬騎擣虛回定知獻馬胡雛入
看即稱觴都護來

中原日月九夷知不用禽胡蒙鼓旗更向天階舞干羽

降書剽破一年遲

聞洮西捷報

漢得洮州箭有神斬關禽敵不逡巡將軍快上屯田計
要納降胡十萬人

遙知一炬絕河津生縛青宜不動塵付與山川印如斗

忍為鼠子腹心人

聞洮東捷報

謝鄭閣中惠高麗畫扇二首

會稽內史三韓扇分送黃門畫省中海外人煙來眼界

全勝博物注魚蟲

蘋汀游女能騎馬傳道蛾眉盡不如寶扇真成集陳集
史臣今得殺青書

戲贈米元章二首

萬里風帆水著天麝煤鼠尾過年年滄江靜夜虹貫月
定是米家書畫船

我有元暉古印章印利不忍與諸郎虎兒筆力能扛鼎
教字元暉繼阿章

次韻徐文將至國門二首

槐催舉子著花黃
來食邯鄲道上梁
便欲掃牀懸麈尾
正愁喘月似燈光

千頭剖蚌明珠熟
百尺垂絲鱸縷長
柳下石門君有此
可能衝雪壓清涼

趙子充示竹夫人詩蓋涼寢竹器憩臂休膝似非

夫人之職予為名曰青竹

一作竹

奴并以小詩取之二

首

青奴元不解梳粧合在禪齋夢蝶牀公自有人同枕簟
肌膚冰雪助清涼

穠李四絃風拂席昭華三弄月侵牀我無紅袖堪娛夜
政要青奴一味涼

往歲過廣陵值早春嘗作詩曰春風十里珠簾卷
髣髴三生杜牧之紅藥梢頭多罌粟揚州風物鬢
成絲今春有自淮南來者道揚州事戲以前韻寄
王定國二首

淮南二十四橋月馬上時時夢見之想得揚州醉年少
正園紅袖寫烏絲

日邊置論誠深矣聖處時中乃得之莫作秋蟲促機杼
貧家能有幾絢絲

謝公擇舅分賜茶三首

外家新賜蒼龍壁北焙風煙天上来明日蓬山破寒月
先甘和夢聽春雷

文書滿案惟生睡夢裏鳴鳩喚雨來乞與降魔大圓鏡

真成破柱作驚雷

紅題葉字色青箬割取丘郎春信來
拚洗一春湯餅睡

亦知清夜有蚊雷

丘子進
外家壻

呈外舅孫莘老二首

九陌黃塵烏帽底五湖春水白鷗前
扁舟不為鱸魚去
收取聲名四十年

甕社湖中有明月淮南草木借光輝
故應剖蚌登王室
不若含沙弄夕霏

以天壇靈壽杖送革老

王屋千霜老紫藤扶公休沐對親朋異時駟馬安車去
拄到天壇願力能

從張仲謀乞蠟梅

聞君寺後野梅發香蜜染成宮樣黃不擬折來遮老眼
欲知春色到池塘

乞姚花二首

正是風光嬾困時姚黃開晚落應遲欲雕好句乞春色

日歷如山不到詩

青春日月鳥飛過汗簡文書出疊重乞取好花天上看

宮衣黃帶御爐風

風一作烘

寄杜家父二首

紅紫爭春觸處開九衢終日攢車雷間情欲被春將去
鳥喚花驕只麼回

風塵點汙青春面自汲寒泉洗醉紅徑欲題詩嫌浪許
杜郎覓句有新功

王才元舍人許牡丹求詩

聞道潛溪千葉紫
主人不剪要題詩
欲搜佳句恐春老
試遣七言賒一枝

謝王舍人剪送狀元紅

清香拂袖剪來紅
似繞名園曉露叢
欲作短章憑阿素
緩歌誇與落花風

寺齋睡起

桃李無言一再風
黃鸝唯見綠恁恁
人言九事八為律

儻有江船吾欲東

次韻王稚川客舍二首

舊詩

五湖歸夢常苦短一寸客愁無奈多
慈母每占烏鵲喜

閨人應賦戍戍歌

百里奚仕秦其妻歌曰百里奚五羊皮憶別時烹伏雌炊戍戍今日富貴

忘我為

身如病鶴翅翎短心似亂絲頭緒多
此曲朱門歌不得

湖南湖北竹枝歌

同元明過洪福寺戲題

洪福僧園拂紺紗舊題塵壁似昏鴉春殘已是風和雨
更著游人撼落花

戲答晁適道乞消梅二首

青莎徑裏香未乾黃鳥陰中實已團
烝豆作烏鹽作白
屬聞丹杏薦牙盤

北客未嘗眉自顰南人誇說齒生津
磨錢和密誰能許
去蒂供鹽亦可人

題淨因壁二首

暝倚團蒲挂鉢囊半牕疎箔度微涼蕉心不展待時雨

葵葉為誰傾夕陽

挂鉢囊一作畫夢長

門外黃塵不見山此中草木亦常閒履聲如度薄冰過
催粥華鯨吼夜闌

以梅餽晁適道戲贈二首

帶葉連枝摘未殘依稀茶塢竹籬間相如病渴應須此
莫與文君蹙遠山

渴夢吞江起解顏詩成有味齒牙間前身鄴下劉公幹

今日江南庾子山

憶邢惇夫

詩到隨州更老成
江山為助筆縱橫
眼睂白壁埋黃壤
何況人間父子情

戲答張祕監饋羊

細肋柔毛飽卧沙
煩公遣騎送寒家
忍令無罪充庖宰
留與兒童駕小車

戲詠猩猩毛筆

枕柳葉暗賓郎紅朋友相呼墮酒中政以多知巧言語
失身來作管城公

客有和予前篇為猩猩解嘲者復戲作詠

明牕脫帽見蒙茸醉著青鞋在眼中束縛歸來儻無辱
逢時猶作黑頭公

六月十七日晝寢

紅塵席帽烏韉裏想見滄洲白鳥雙馬齧枯苴諠午枕
夢成風雨浪翻江

北牕

生物趨功日夜流
園林才夏麥先秋
綠陰黃鳥北牕簾
付與來禽安石榴

題伯時天育驃騎圖二首

玉花照夜今無種
櫪上追風亦不傳
想見真龍如此筆
蒺藜沙晚草迷川

明牕槃礴萬物表
寫出人間真乘黃
邂逅今身猶姓李
可非前身江都王

子瞻寺壁作小山枯木

海內文章非畫師能回筆法作枯枝豫章從小有梁棟
也似鄭公雙鬢絲

題惠崇畫扇

惠崇筆下開江面萬里晴波向落暉梅影橫斜人不見
鴛鴦相對浴紅衣

題郭熙山水扇

郭熙雖老眼猶明便面江山取意成一段風煙且千里

解如明月逐人行

題劉將軍鴈

將軍一矢萬人看
雪灑晴空碎羽翰
乞與失羣沙宿鴈
筆間千頃暮江寒

山谷集卷九

欽定四庫全書

山谷集卷十

宋 黃庭堅 撰

律詩七十八首

和答元明黔南贈別

萬里相看忘逆旅，三聲清淚落離觴。
朝雲往日攀天夢，夜雨何時對榻涼。
急雪脊令相並影，驚風鴻鴈不成行。
歸舟天際常回首，從此頻書慰斷腸。

贈黔南賈使君

綠髮將軍領百蠻，橫戈得句一開顏。
少年圯下傳書客，老去崆峒問道山。
春入鶯花空自笑，秋成梨棗為誰攀。
何時定作風光主，待得征西鼓吹還。

萬州太守高仲本宿約遊岑公洞而夜雨連明戲作二首

肩輿欲到岑公洞，正怯衝泥傍險行。
定是岑公闕清境，春江一夜雨連明。

蓬窗高枕雨如繩恰似糟牀壓酒聲今日岑公不能飲
吾儕聞健且頻傾

萬州之下巖唐末有劉道者定州無極人聞道於
雲居膺禪師為開巖第一祖法號道微自鑿石龕
曰死便藏龕中不用日時門人奉其命二百年來
遊者題詩不可勝讀莫能起此開巖者故子作二
篇表見之其一用楊子安韻其一用王定國韻

用楊

子安韻一篇在
古詩第五卷

金
寺古松楠老嵒虛塔廟開僧緣蠶麥去官數荔支來石
室無心骨金鋪稱意苔若為劉道者拽得鼻頭迴

又戲題下巖

往往携家來託宿裙襦參錯佛衣巾未嫌滿院油頭臭
蹋破苔錢最惱人

外姪李光祖往見尚垂髫今觀寄嗣直小詩已可

愛因次韻

知命

昔別長安未裹頭如今詩句可消愁外家未覺風流遠

他日相期到益州

李公擇終
於益州帥

戲題巫山縣用杜子美韻

巴俗深留客，吳儂但憶歸。
直知難共語，不是故相違。
東縣聞銅臭，江陵換袂衣。
丁寧巫峽雨，慎莫暗朝暉。

戲答劉文學

如命

人鮮甕中危，萬死鬼門關。
外更千岑問，君底事向前去。
要試平生鐵石心。

馬上口號呈建始李令

如命

驛亭新似眼般明
箐路開如掌樣平
誰與長官歌美政
風搖松竹是懽聲

次韻答清江主簿趙彥成

知命

日轉溪山幾百遭
厭聞虎嘯與猿號
笙歌忽把二天酒
風雨猶驚三峽濤
已作齊民尋要術
安能痛飲讀離騷
看君自是青田質
清唳當聞徹九臯

將次施州先寄張十九使君

知命

書來日日覺情親
今信施州是故人
許我投名重入社

放狂作惱未應嗔

收拾從來古錦囊
今知老將敵難當
囊中尚有毛錐子
花底尊前作戰場

一別施州向十霜
傳聞佳句望風降
空拳不易當堅敵
振臂猶思起病瘡

和仲謀送別二首

知命

夜郎自古流遷客
聖世初投第一人
不見施州肯回首
五溪三峽更誰親

金
五溪三峽漫經春百病千愁逢故人何處看君歲寒後
欲將兒女更論親

題蘇若蘭回文錦詩圖

千詩織就回文錦如此陽臺暮雨何亦有英靈蘇蕙手
只無悔過竇連波

宋楸宗寄夔州五十詩三首

知命

五十清詩是碎金試教擲地有餘音方今臺閣稱多士
且傍江山好處吟

五十清詩一段冰持來恰得慰愁生自張壁間行坐看
更教兒誦醉時聽

碑同峴首千年石詩到夔州十絕歌佗日巴人懷叔子
時時解著手摩挲

次韻林宗送別二首

知命

一百八盤天上路去年明日送流入小詩話別堪垂淚
却道情親不得親

別駕柴門閉一春艱難顛沛不忘君何時幽谷回天日

金匱要略卷之四
教保餘生出瘴雲

次韻黃斌老晚游池亭二首

路入東園無俗駕，忽逢佳士喜同遊。
綠荷菡萏稍覺晚，黃菊拒霜殊未秋。
客位正須懸榻下，主人自愛小塘幽。
老夫多病蠻江上，頗憶平生馬少游。

客位一作客至

岑寂東園可散愁，膠膠擾擾夢神遊。
萬竿苦竹旌旗卷，一部鳴蛙鼓吹休。
雨後月前天欲冷，身閒心遠地常幽。
杜門謝客恐生謗，且作人間鵬鷖游。

次韻楊君全送酒長句

扶衰却老世無方，唯有君家酒未嘗。
秋入園林花老眼，茗搜文字響枯腸。
醉頭夜雨排簷滴，盃面春風繞鼻香。
不待澄清遣分送，定知佳客對空觴。

次韻君全送春花

化工能幹大鈞迴，不得東君花不開。
誰道纖纖綠窓手，輕刀剪綵喚春來。

謝景仁承事送惠酒器

楊君喜我梨花盞却念初無注酒魁孌矮金壺肯持送
授菽殘菊更傳杯

戲答史應之三首

先生早擅屠龍學袖有新硯不試刀歲晚亦無雞可割
庖蛙煎鱸薦松醪

老萊有婦懷高義不厭夫家苜蓿盤收得千金不龜藥
短裙漂紈草江寒

甌有輕塵釜有魚漢庭日日召嚴徐不嫌藜藿來同飯

更展芭蕉看學書

謝應之

昨夜風雷震海隅
天心急擬活焦枯
去年席上蛟龍語
未委先生記得無

史彥送春花

千林搖落照秋空
忽散穠花在眼中
蝶繞蜂隨俱入座
君家女手化春風

荅李任道謝分豆粥

金少正
卷十
豆粥能驅晚瘴寒與公同味更同餐安知天上養賢鼎
且作山中煮菜看

次韻文少激推官祈雨有感

窮儒憂樂與民同何況朱輪職勸農終日齏鹽供一飯
幾時膚寸冒千峯未須丘垤占鳴鸛只要雷霆起卧龍
從此滂沱徧枯槁愛民天子似仁宗

次韻少激甘露降太守居桃葉上

金莖甘露薦齋房潤及邊城草木香
蕝實葉間天與味

成蹊枝上月翻光
羣心愛戴葵傾日
萬事驅除葉墮霜
玉燭時和君會否
舊臣重疊起南荒

次韻奉荅少激紀贈二首

詩來清吹拂衣巾
句法詞鋒覺有神
今日相看青眼舊
他年肯作白頭新
文如霧豹容窺管
氣似靈犀可辟塵
慙愧相期在臺省
無心枯木豈能春

文章藻鑒隨時去
人物權衡逐勢低
揚子墨池春草遍
武侯祠廟曉鶯啼
書帷寂寞知音少
幕府留連要路迷

全宋文卷之二十二
卷十
顧我何人敢推輓看君桃李合成蹊

走筆謝王朴居士拄杖

投我木瓜霜雪枝六年流落放歸時千巖萬壑須重到
脚底危時幸見持

戲答王居士送文石

南極一星天九秋自埋光景落江流是公至樂山中物
乞與衰翁似暗投

次韻馬荊州

六年絕域夢刀頭，判得南還萬事休。
誰謂石渠劉校尉，來依絳帳馬荊州。
霜髭雪鬢共看鏡，茱萸菊英同送秋。
他日江梅臘前破，還從天際望歸舟。

次韻荅馬中玉三首

雨入紗窗風簸船，菊花過後早梅前。
錦江春色薰人醉，也到壺中小隱天。

卷沙成浪北風顛，銜尾千艘不敢前。
匝岸水居皆有酒，行人得意買江天。

仁氣已蒸全楚盡同雲欲合暮江前爭春梅柳無三月
對雪樽罍屬二天

次韻中玉早梅二首

梅蘂爭先公不嗔知公家有似梅人何時各得自由去

相逐

一作赴

揚州作好春

折得寒香不露機小窻斜日兩三枝羅幃翠幕深調

一作遮

護已被遊蜂望得知

次韻中玉水仙花二首

借水開花自一奇
水沉為骨玉為肌
暗香已壓酴醾倒
只此寒梅無好枝

淤泥解作白蓮藕
棄壤能開黃玉花
可惜國香天不管

隨緣流落小民家

時間民間
一事如此

吳君送水仙花二大本

折送南園粟玉花
并移香本到寒家
何時持上玉宸殿
乞與宮梅定等差

劉邦直送早梅水仙花三首

金華集卷之二十一
卷十一
簸船綰纜北風噴霜落千林憔悴人欲問江南近消息
喜君貽我一枝春

探請東皇第一機水邊風日笑橫枝鴛鴦浮弄嬋娟影
白鷺窺魚凝不知

得水能仙天與奇寒香寂寞動冰肌仙風道骨今誰有
淡掃蛾眉簪一枝

贈李輔聖

交蓋相逢水急流八年今復會荊州已回青眼追鴻翼

肯使黃塵沒馬頭，舊管新收幾粧鏡。流行坎止一虛舟。

相看絕嘆女博士，筆研管絃成古丘。

女博士謂輔聖後房孔君也。於文藝

無所不能，能皆妙絕。

和高仲本喜相見

雨昏南浦曾相對，雪滿荊州喜再逢。有子才如不羈馬，知公心是後凋松。閒尋書冊應多味，老傍人門似更慵。何日晴軒觀筆硯，一樽相屬要從容。

戲呈聞善二兄

金
匏懸籬落鵝窺井草上階除雪滾風想得尊前歌醉帽
渾家兒女笑山公

次韻聞善

扶醉三竿日題詩一研埃張羅門帶雪投轄井生苔待
得成丘壠誰能把酒盃常應黃菊畔帳望白衣來

戲荅王觀復醑醑

誰將陶令黃金菊幻作醑醑白玉花小草真成有風味
東園添我老生涯

呂園未肯輕沽我且寄田家砌下栽他日秋花媚重九
清香知自故人來

戲荅荊州王充道烹茶四首

三徑雖鋤客自稀醉鄉安穩更何之老翁勸把春風椀
靈府清寒要作詩

茗椀難加酒椀醇暫時扶起藉糟人何須忍垢不濯足
苦學梁州陰子春

香從靈壑隴上發味自白石源中生為公喚覺荊州夢

可待南柯一夢成

龍焙東風魚眼湯箇中即是白雲鄉更煎雙井蒼鷹爪
始耐落花春日長

次韻荅高子勉十首

雪盡虛簷滴春從細草迴德人泉下夢俗物眼中埃久
立我有待長吟君不來重玄鎮闕鑰要待玉是開

掃雪我三日御風君過旬言詩今有數下筆不無神行
布衾期近飛揚子建親可憐金石友去不待斯人

峴南羈旅井灞上獵歸亭日繞分魚市風回落鴈汀
筆由詩客把笛為故人聽但恐蘇耽鶴歸時或姓丁
君不居郎省還應上諫坡才高殊未識歲晚喜無他
樞馬羸難出鄰雞凍不歌寒爐餘幾火灰裏撥陰何
荆渚樓中賦南陽壠底吟誰言小隱處頻屈故人臨
經笥難窺底詞源幸汲深思君眠竹屋雪月冰寒衾
驚人得佳句或以傲王公處世要清節滑稽安足雄
深沉似康樂簡遠到安豐一點無俗氣相期林下同

志士難推轂將如高子何心期誠不淺餘論或相多欲
向滄洲去還能小艇麼鷓鴣西照處相並曬漁蓑

鑿開混沌竅窺見伏羲心有物先天地含生盡陸沉伐
山成大厦鼓橐鑄祥金三尺無絃木期君發至音

少年基一簣長歲足三餘忍作飛黃去頃超同隊魚尊
前八采句窻下十年書定作牛腰束傳抄聽小胥

沙上步微暖思君剩欲招萋蒿穿雪動楊柳索春饒枉
駕時逢出新詩若見撩樽前遠湖樹來飲莫辭遙

入窮巷謁李材叟翹叟戲贈無簡田子平三首

紫冠黃鈿網絲窠蝶繞蜂圍柰晚何二叟家居如避世

開門自少俗人過

紫冠雞冠
黃鈿黃菊

只可室中安止止誰能鐵裏鬪錚錚田多穀少無人會
匹似無田過一生

田郎杞菊荒三徑文字時追二叟游萬卷藏書多未見
老夫端擬乞荊州

呈楊康國

金人元好問集卷十
君家秋實羅浮種已作纍纍半拂牆
莫遣兒童酸打盡
要看霜後十分黃

又戲呈康國

整冠行客莫先嘗
楊子家無數仞牆假借肅霜令弄色
勾添寒日與爭黃


和中玉使君晚秋開天寧節道場

江南江北盡雲沙
車騎東來風旆斜
倒影樓臺開紫府
得霜籬落賸黃花
釣溪築野收多士
航海梯山共一家

想見星壇祝堯壽步虛聲裏靜無譁

謝益修四弟送石屏

石似滄江落日明
鸕鷀鳥鵲滿沙汀
小兒骨相能文字
乞與班班作硯屏



山谷集卷十

欽定四庫全書

集部
山谷集卷十三

詳校官庶吉士臣胡鈺

檢討臣何思鈞覆勘

總校官進士臣朱鈐

校對官編修臣盧遂

謄錄監生臣康又民

欽定四庫全書

山谷集卷十一

律詩八十一首

雨中登岳陽樓望君山二首

投荒萬死鬢毛斑
生入瞿塘滌瀕關
未到江南先一笑
岳陽樓上對君山

滿川風雨獨憑欄
綰結湘娥十二鬟
可惜不當湖水面

銀山堆裏看青山

自巴陵界平江臨湘入通城無日不雨至黃龍奉
謁清禪師繼而晚晴邂逅禪客戴道純歎語作長
句呈道純

山行十日雨霑衣幕阜峯前對落暉野水自添田水滿
晴鳩却喚雨鳩歸靈源大士人天眼雙塔老師諸佛機
白髮蒼顏重到此問君還是昔人非

新喻道中寄元明用觴字韻

中年畏病不舉酒孤負東來數百觴
喚客煎茶山店遠看人秧稻午風涼
但知家裏俱無恙不用書來細作行
一百八盤攜手上至今猶夢遶羊腸

戲效禪月作遠公詠

并序

遠法師居廬山下持律精苦過中不受密湯而作詩
換酒飲陶彭澤送客無貴賤不過虎溪而與陸道士
行過虎溪數百步大笑而別故禪月作詩云愛陶長
官醉兀兀送陸道士行遲遲買酒過溪皆破戒斯何

人斯師如斯故效之

邀陶淵明把酒梳送陸修靜過虎溪曾次九流清似鏡
人間萬事醉如泥

湖口人李正臣蓄異石九峯東坡先生名曰壺中
九華并為作詩後八年自海外歸過湖口石已為
好事者所取乃和前篇以為笑實建中靖國元年
四月十六日明年當崇寧之元五月二十日庭堅
繫舟湖口李正臣持此詩來石既不可復見東坡

亦下世矣感歎不足因次前韻

有人夜半持山去頓覺浮嵐暖翠空試問安排華屋處
何如零落亂雲中能迴趙璧人安在已入南柯夢不通
賴有霜鍾難席卷袖椎來聽響玲瓏

追和東坡題李亮功歸來圖

今人常恨古人少今得見之誰謂無欲學淵明歸作賦
先煩摩詰畫成圖小池已築魚千里隙地仍栽芋百區
朝市山林俱有累不居京洛不江湖

次韻雨絲雲鶴二首

煙雲杳靄合中稀
霧雨空濛密更微
園客繭絲抽萬緒
蛛蝥網面罩羣飛
風光錯綜天經緯
草木文章帝杼機
願染朝霞成五色
為君王補坐朝衣

幾片雲如薛公鶴
精神態度不曾齊
安知隴鳥樊籠密
便覺南鵬羽翼低
風散又成千里去
夜寒應上九天栖
坐來改變如蒼狗
試欲揮毫意自迷

題徐氏書院

德占羨魚亭故基也

學書但學溪老鵝讀書可觀樵夫歌紫髯將軍不復見

空餘巖桂綠婆婆

老一作嫗
歌一作柯

贈石敏若

才似謫仙惟欠酒情如宋玉更逢秋相看領會一談勝
注目長江天際流

罷姑孰寄元明用觴字韻

追隨富貴榮牽尾準擬田園略濫觴本與江鷗成保社
聊隨海燕度炎涼未栽姑孰桃李徑却入江西鴻鴈行

別後常同千里月書來莫寄九迴腸

榮一作勞

和文潛舟中所題

雲橫疑有路天遠欲無門信矣江山美懷哉謫逐魂長
波空淮記佳句洗眇昏誰奈離愁得村醪或可尊

題君子泉

雲夢澤南君子泉水無名字託人賢兩蘇翰墨相為重
未刻他山世已傳

鄂州南樓書事四首

四顧山光接水光
凭闌十里芰荷香
清風明月無人管
併作南樓一味涼

畫閣傳觴容十客
透風透月兩明軒
南樓槃礴三百尺
天上雲居不足言

勢壓湖南可長雄
胸吞雲夢略從容
北船未嘗覩巨麗
複閣重樓天際逢

武昌叅佐幕中畫
我亦來追六月涼
老子平生殊不淺
諸君少住對胡牀

南樓畫閣觀方公悅二小詩戲次韻

十年華屋網蛛塵
大旆重來一日新
五鳳樓中修造手
箇中餘刃亦精神

重山複水繞深秋
不見高賢獨倚樓
手拂壁間留恨句
凌波微步有人愁

次韻王安國紀夢

樂城集亦有此詩

道人偶許俗人知
法喜非妻解養兒
夜久金莖添沆瀣
室虛壁月映琉璃
遠來醉俠忽忽去
近出詩仙句句奇

獨怪區區踐繩墨相逢未省角巾欵

寄賀方回

少游醉卧古藤下誰與愁眉唱一盃
解作江南斷腸句只今惟有賀方回

謝檀敦信送柑子

色深林表風霜下香著尊前指爪間
書後合題三百顆頻隨驛使未應慳

戲答王子予送凌風菊二首

病來孤負鷓鴣杓，禪板蒲團入眼中。
浪說閒居愛重九，黃花應笑白頭翁。

王郎頗病金瓢酒，不耐寒花晚更芳。
瘦盡腰圍怯風景，故來歸我一枝香。

謝王子予送橄欖

方懷味諫軒中果，忽見金盤橄欖來。
想共餘甘有瓜葛，

苦中真味晚方迴。

戎州蔡次律家軒外有
餘甘，余名之曰味諫。

以椰子小冠送子予

漿成乳酒醺人醉肉截鵝肪上客盤有核如匏可雕琢
道裝宜作玉人冠

次韻文潛立春日三絕句

渺然今日望歐梅已發黃州首更回試問淮南風月主
新年桃李為誰開

誰憐舊日青錢選不立春風玉笋班傳得黃州新句法
老夫端欲把降幡

江山也似隨春動花柳真成觸眼新清濁盡須歸甕蟻

吉山更莫問波臣

再次前韻

春工調物似鹽梅
一根中生意回風日安排
催歲換丹青次第與花開

久狎漁樵作往還
曉風宮殿夢催班
鄰娃似與春爭道
酥滴花枝綵剪幡

酒有全功筆有神
可將心付白頭新
春盤一任人爭席
莫道前銜是近臣

陳榮緒惠示之字韻詩推獎過實非所敢當輒次

高韻三首

紛紛不可耐君子有憂之執掌誠莊語賢勞似怨詩顏

波閱砥柱濁水得摩尼

杜子美云惟有摩尼珠可照濁水源

知我無枝葉

剗心只有皮

太丘胷量闊一葦莫杭之萬事不掛眼四愁猶有詩狀

閒聊闌葦心潔似毗尼

僧律也

早晚同舟去烟波學子皮

再和之字韻非以作難得巧
為工亦欲見詩之無窮爾

十家有忠信江夏可無之政苦寄賣友忽聞衡說詩飢

蒙青糲飯寒贈紫陀尼

蕃

酬報矜難巧深慚陸與皮

德孺五丈和之字詩韻難而愈工輒復和成可發一

笑

且然聊爾耳得也自知之獨笑真成夢狂歌或似詩照

灘禽郭索燒野得伊尼

鹿名出
佛書

早晚來同醉僧窓卧虎

皮

次韻德孺五丈新居病起

潭潭經略府寂寂閉門居
京洛聖賢宅江湖魚鼈瀦
宦如一夢覺話勝十年書
稍喜過從近扶筇不駕車

次韻德孺五丈感興二首

於此吾忘我從誰尺直尋
事來千萬種人有兩三心
自守藩籬小猶能井臼任
過時雖不采吾與菊花斟

眼前嘗廢忘事往更追尋
愛酒陶元亮著書王仲任
寒浦雖有節枯木已無心
客至還須飲逢歡起自斟

次韻德孺五丈惠貺秋字之句

少日才華接貴游老來忠義氣橫秋未應白髮如霜草
不見丹砂似箭頭顧我今成喪家狗期君早作濟川舟
漢家宗社英靈在定是寒儒浪自愁

求范子默染鴟青紙二首

學似貧家老破除古今迷忘失三餘極知鴟白非新得

漫染鴟青襲舊書

老一作免

深如女髮蘭膏罷明似山光夜月餘為染藤溪三百箇
待渠湔拂一牀書

謝榮緒惠貺鮮鰓

偶思煥老庖元鰓公遣霜鱗貫柳來
釐曰方看金作屑
鱠盤已見雪成堆

謝榮緒割麋見貽二首

何處驚麋觸禍機
煩君遣騎割鮮肥
秋來多病新開肉
糲飯寒菹得解圍

二十餘年枯淡過
病來飭下劇甘肥
果然口腹為災怪
夢去呼鷹雪打圍

吳執中有兩鵝為余烹之戲贈

學書池上一雙鵝
宛頸相追筆意多
皆為涪翁赴湯鼎
主人言汝不能歌

題默軒和遵老

平生三業淨在俗亦超然
佛事一盂飯橫眠不學禪
松風佳客共茶夢小僧圓
漫續山家頌非詩莫浪傳

和涼軒二首

打荷看急雨吞月任行雲
夜半蚊雷起西風為解紛

茗椀夢中覺荷花鏡裏香涼生只當處暑退亦無方

題東寺柱

康州詩

竹風松月牢於鎖關閉人心物外情燕雀閒經俱已慣
飛來不怕讀書聲

病來十日不舉酒二首

病來十日不舉酒獨卧南牀春草生承君折送袁家紫

令我發與郎官清

發與一作興發

病來十日不舉酒回施青春與後生滿袖東風慙人意

見君詩與字俱清

題小景扇

草色青青柳色黃
桃花零落杏花香
春風不解吹愁却
春日偏能惹恨長

次韻廖明略陪吳明府白雲宴集

江淨明花竹山空響管絃
風生學士塵雲繞令君筵
百越餘生聚三吳遠接連
庖霜刀落鱸執玉酒明船
葉縣飛來舄壺公謫處天
酌多時暴謔舞短更成妍
唯我孤

登覽觀詩未究宣空餘五字賞文似兩京然鑒是肱三
折官當歲九遷老夫看鏡罷衰白敢爭先

丈一
作大

醇道得蛤蜊復索舜泉舜泉已酌盡官酒不堪不
敢送

青州從事難再得牆底數樽猶未眠商略督郵風味惡
不堪持到蛤蜊前

秋冬之間鄂渚絕市無蟹今日偶得數枝吐沫相
濡乃可憫笑戲成小詩三首

怒目橫行與虎爭寒沙奔火禍胎成雖為天上三辰次
未免人間五鼎烹

勃宰盤跚烝涉波草泥出沒尚橫戈也知穀鯀元無罪
柰此尊前風味何

解縛華堂一座傾忍堪支解見薑橙東歸却為鱸魚膾
莫把知言許季鷹

甯子興追和子岳陽樓詩復次韻二首

去年新霽獨憑闌山似樊姬擁髻鬟箇裏宛然多事在

世間遙望但雲山

軒皇樂罷拱清班
天地為家不閉關
惟有金爐紫煙起
至今留作御前山

和甯子興白鹿寺

谷郎巖開見佛燈
雲遮霧掩碧層層
青山得意看流水
白鹿歸來失舊僧

謝人惠貓兒頭笋

長沙一月煨鞭笋
鸚鵡洲前人未知
走送煩公助湯餅

貓頭突兀想穿籬

蠟梅

天上戲剪百花房奪盡人工更有香埋玉地中成故物
折枝鏡裏憶新粧

短韻奉乞蠟梅

卧雲莊上殘花笑香似早梅開不遲淺色春衫弄風日
遣來當為作新詩

十二月十九日夜中發鄂渚曉泊漢陽親舊攜酒

追送聊為短句

接浙報官府敢違王事程宵征江夏縣睡起漢陽城鄰
里煩追送杯盤瀉濁清祇應瘴鄉老難答故人情

次韻陳榮緒同倚鍾樓晚望別後明日見寄之作

天外僧伽塔斜暉極照臨凭闌隨處好殘雪何來深青
草無風浪枯松半死心所謂城南老樹精衡陽有回鴈他日更

傳音

過土山寨

南風日日縱篙撐時喜北風將我行湯餅一杯銀線亂
蔓蒿數筋玉簪橫

題花光畫

湖北山無地湖南水徹天雲沙真富貴翰墨小神仙

此平

沙起水筆意超凡入聖法也每率此為之當冠四海而名後世

題花光畫山水

花光寺下對雲沙欲把輕舟小釣車更看道人煙雨筆
亂峯深處是吾家

所住堂

此山花光佛所住今日花光還放光天女來修散花供道人自有本來香

題高節亭邊山礬花二首

并引

江湖南野中有一種小白花本高數尺春開極香野人謂之鄭花王荊公嘗欲作詩而陋其名予請名曰山礬野人採鄭花葉以染黃不借礬而成色故名山礬海峽孤絕處補陀山譯者以謂小白花予疑即此

花爾不然何以觀音老人端坐不去耶

世作場花山
谷寫為鄭

高節亭邊竹已空山磬獨自倚春風
二三名士開顏笑
把斷花光水不通

北嶺山磬取次開清風
正用此時來平生習氣難料理
愛著幽香未擬回

贈惠洪

數面欣羊腴論詩喜雉膏
眼橫湘水暮雲獻楚山高墮
我玉麈尾乞君宮錦袍
月清放舟舫萬里渺雲濤

戲詠零陵李宗古居士家馴鷓鴣二首

李唯一妻一女垂老

病足養鷓鴣
鷓以樂餘年

山雌之弟竹鷄兄乍入雕籠便不驚此鳥為公行不得
報晴報雨總同聲

真人夢出大槐宮萬里蒼梧一洗空終日憂兄行不得
鷓鴣當是鼻亭公

李宗古出示謝李道人茗帚杖

從蔣彥回乞藝地
二頌作二詩奉呈

提攜禪客扶衰杖斷當姻家葬骨山因病廢碁仍廢酒

鷓鴣鸚鵡伴清閒

詩書傳女似中郎杞菊同盤有孟光今日鷓鴣鳴蹇蹇
他年鸚鵡恨堂堂

宜陽別元明用觴字韻

霜須八十期同老酌我仙人九醞觴

衍者言吾兄皆壽
八十近得重醞法

甚明月灣頭松老大永思堂下草荒涼千秋風雨鴈求

友萬里雲天鴈斷行別夜不眠聽鼠齧非關春茗攪枯

腸

寄黃龍清老三首

萬山不隔中秋月一鴈能傳寄遠書
深密伽陀枯戰筆真成相見問何如

風前橄欖星宿落日下枕櫺羽扇開
照默堂中有相憶清秋忽遣化人來

騎驢覓驢但可笑非馬喻馬亦成癡
一天月色為誰好二老風流只自知

山谷集卷十一